

13/06/1997

Mahathir hadir di sidang D8

Mior Kamarulbaid Mior Shahid in Istanbul
ISTANBUL, Khamis - Perdana Menteri, Datuk Seri Dr Mahathir Mohamad dijangka tiba di sini Sabtu ini untuk menghadiri sidang puncak ketua-ketua negara Kumpulan Lapan Negara Membangun (D8), sebuah kumpulan eksklusif yang akan menjadi model kerjasama di antara lapan negara dan diperluaskan kepada negara-negara dalam Pertubuhan Persidangan Islam (OIC).

D8 dianggotai negara-negara Islam yang maju dalam beberapa sektor ekonomi, teknologi, perdagangan dan sumber manusia - Malaysia, Iran, Turki, Mesir, Indonesia, Nigeria, Pakistan dan Bangladesh.

Kelapan-lapan negara ini mewakili kira-kira 800 juta penduduk Islam. Setakat ini enam ketua negara akan hadir dalam sidang puncak yang akan dirasmikan oleh Presiden Republik Turki, Suleyman Demirel, Ahad ini, kecuali Mesir dan Nigeria.

Ia adalah sidang puncak pertama bagi menandakan penubuhan D8 setelah dicadangkan penubuhannya oleh Perdana Menteri Turki, Necmettin Erbakan pada Oktober tahun lalu. Kelapan-lapan pemimpin akan menandatangani deklarasi sidang puncak dan penubuhan D8.

Ketika di sini Dr Mahathir yang masih bercuti, akan mengadakan pertemuan dua hala antara lain dengan Necmettin Erbakan; Perdana Menteri Bangladesh, Sheikh Hasina; Perdana Menteri Pakistan, Nawaz Sharif dan Presiden Soeharto, Indonesia. Dr Mahathir juga akan mengunjungi Presiden Suleyman Demirel.

(END)